

nisi signa elegantia apta ad sensum exprimendum. Si ergo Deus sua inspiratione rerum et sensuum ita agit in hominem inspiratum ad scribendum, ut liber scriptus *infallibiliter vi ipsius operationis divinae* vere et sincere contineat sensa Dei, cum ipsa inspiratione cohaereat necesse est seu in ea includatur talis operatio divina, ut homo scribens non solum actu eligat, sed etiam *infallibiliter eligat signa apta* ad res et sententias inspiratas vere et sincere exprimendas, atque adeo in signorum aliorumque quae ad partem materiale pertinent, apta electione redatur infallibilis. Profecto enim homo mente et voluntate inspiratus quidem ad sensa Dei scribenda, sed in signorum electione plene sibi permisso, maneret fallibilis in exprimendis conceptibus inspiratis; hoc autem ipso non esset infallibiliter consequens, librum sub tali inspiratione scriptum esse Scripturam *terminative* inspiratam et verbum Dei. Atqui ut crederetur esse infallibiliter verbum Dei, numquam aliud argumentum quae sit est, quam quod scriptor humanus esset inspiratus. Sicut ergo cum inspiratione activa infallibiliter nectitur *inspiratio terminativa* (inspiratum esse) ipsius operis, ita in notione inspirationis activae includitur operatio divina, qua homo efficiatur infallibilis in exprimendis conceptibus inspiratis, h. e. in ipsis aptorum signorum ac terminorum electione.

2°. Ex dictis iam patet, qualis sit haec operatio divina, quam dicimus cum inspiratione connexam. Scopus sacrorum librorum saltem in plerisque talis est, ut *formalis ratio* librorum prae hoc scopo non mutetur, si alii vocabulis, alio stylo eadem res et sententiae exprimantur, dummodo termini qui possunt esse alii atque alii, adhibeantur idonei et rebus respondentes. Pertinet ergo saltem in plerisque non ad *rationem formalem* sed ad *rationem materialiem* Scripturarum, quod sententiae his potius quam alii terminis aequipollentibus exprimantur. *Nec putemus in verbis* Scripturarum esse evangelium *sed in sensu*, non in superficie sed in medulla, non in sermonum foliis sed in radice rationis » s. Hieronym. in Gal. I. 11. 12. T. VII. p. 386. Iam vero ut quis sit auctor libri, requiritur quidem,

ut id omne quod prae libri scopo constituit eius rationem formalem, ab ipso sit tamquam ab auctore principe; non autem requiritur, ut eodem modo ab ipso sit, quod in libro prae eius scopo *materialiter* se habet, nec eius propriam rationem constituit. Ergo potest quicunque per alium tamquam per causam instrumentalem verissimum auctor esse libri, quin ipse terminos in individuo et stylum totamque constructionem grammaticam et rhetoricae suppeditet. Ut tamen nihilominus per suppeditationem rerum et sententiarum certum efficiatur, librum scribendum fore ipsius tamquam auctoris principis, necesse est, praecaveat errorem scribentis in electione aptorum signorum.

Ergo ex notione inspirationis seu ex eo, quod Deus est auctor Scripturarum per conscriptores humanos ita, ut ex ipsa actione Dei in homines inspiratos infallibiliter certum sit, Scripturas esse libros Dei ut auctoris; a) in plerisque, ubi videlicet horum potius signorum prae aliis aequipollentibus electio *materialiter* se habet, nulla est ratio affirmandi, Deum ipsum supernaturali praeveniente actione signa et modum scribendi suppeditasse et in individuo determinasse. Est tamen b) ratio evidens affirmandi *assistentiam* Dei, qua scriptoribus humanis in ipsis eligendis signis idoneis ita aderat, ut in conceptibus inspiratis vere et sincere exprimendis essent prorsus infallibiles. c) In hac assistentia et directione quoad ipsum modum orationis includitur *gratia sermonis*, a quod quis efficaciter loquatur (scribat) ad instruendum intellectum, ad movendum affectum, ad flectendum auditorem (vel lectorem) » (1), ut eam explicat s. Thomas 2. 2. q. 117. a. 1. Si autem d) prae scopo alicuius loci vel contextus verba ipsa et stylus in individuo pertinerent ad *rationem formalem*, tum sane ex ipsa notione *inspirationis* et *auctoris libri* deduceretur, verba et stylus esse suppeditata a Deo non secus ac res et sententias. Quia vero huiusmodi formalis ratio difficilime deter-

(1) Per se patet, hanc *gratiam sermonis* pro diverso scopo librorum esse diversam, atque adeo ad ipsam *essentiali* inspirationis hoc charisma non aliter pertinere, nisi quatenus coincidit cum assistentia ad electionem locutionis sufficientis pro scopo libri.

minari potest, et singularis vis, efficacia ac profunditas ipsorum verborum, et quae Patres praedicant de valore eorumdem singulorum verborum Scripturae, partim magis pertinent ad res significatas et ad verbum *formale*, et partim ex assistentia Spiritus Sancti in selectione verborum satis explicantur; propterea ex notione ipsa inspirationis, nisi aliunde probetur, divina suppedatio verborum in individuo in locis singulis vix discerni et statui poterit.

Rerum ordo et dispositio pro diverso scopo libri aliquando constituit partem formalem et pertinet ad ipsa sensa auctoris, aliquando computatur ad stylum. Pro hac diversitate ordo rerum in priori hypothesi ad inspirationem proprie dictam, in posteriori secundum paulo ante demonstrata ad assistentiam divinam referendus erit.

3^a. Ex his quae diximus, tantummodo demonstratur argumento negativo, divinam suggestionem et velut dictationem verborum in individuo non esse essentialiem in notione inspirationis; ac proinde talem dictationem verborum non posse colligi ex eo, quod Deus est auctor Scripturae. Ex hoc autem ipso praesumi debet, ubi non demonstratur oppositum, revera ita factum esse, et Deum qui disponit omnia suaviter, permisisse, ut homines divinis sensis iam collustrati et ad ea scribenda supernaturaliter moti, secundum diversam singulorum indolem et eruditionem ipsi sub divina assistentia reperirent et seligerent idearum inspiratarum signa. Ceterum suppetunt argumenta etiam positiva, ex quibus deducitur, saltem plerunque auctores inspiratos in verbis seligendis et in modo scribendi grammatico ac rhetorico divina assistentia tantum adiutos et munitos, non autem divinitus accepta dictatione ad unum determinatos fuisse. Argumenta haec potissima tria sunt.

a) Evidens est in libris sacris elocutionis et styli diversitas respondens diversae indoli et eruditioni scriptorum. « De Isaia sciendum, inquit s. Hieronymus, quod in sermone suo disertus est, *quippe* (en rationem) ut *vir nobilis et urbanae eloquentiae*, nec habens quidquam in elogio rusticitatis admistum. » Contra « Ieremias sermone quidem apud Hebraeos Isaia et Osee et quibusdam alias

prophetis videtur esse rusticior, sed sensibus par, quippe qui *codem Spiritu prophetaverit*. Porro simplicitas eloquii a loco ei in quo natus est, accidit. Fuit enim Anathotites, qui est usque hodie viculus » Hieronym. Praef. in Is. et Ierem.

b) Dum sacri scriptores diversi e. g. plures Evangelistae referunt non solum eandem rem gestam sed etiam eosdem sermones ab aliis e. g. a Christo Domino dictos, utnatur tamen verbis diversis, quamvis certum sit illum, cuius verba recitare se profitentur, idem non aliis et aliis verbis sed uno tantum modo dixisse. Sic verba, quibus usus est Christus in institutione ss. Eucharistiae, referunt quatuor sacri scriptores Matth. XXVI; Marc. XIV; Luc. XXII; 1. Cor. XI. Singuli autem verba eadem Christi exhibent paulo aliter atque aliter; ita tamen, ut Marcus magis conveniat cum Mattheo, quippe qui huius Evangelium scriptum pree oculis habuisse creditur et ab eruditis probatur, vicissim Lucas proprius accedat ad Paulum, cuius discipulus et sectator fuit. Huius discrepantiae rationem s. Augustinus pluribus explicat eandem, quam nos diximus (de Consens. Evangelist. l. II. n. 27. 28.). « Si ergo quaeritur, inquit, quae verba potius Iohannes Baptista dixerit, utrum quae Mattheus, an quae Lucas eum dixisse commemorat, an quae Marcus... nullo modo hinc laborandum esse iudicat, qui prudenter intelligit, *ipsas sententias esse necessarias cognoscendae veritati, quibuslibet verbis fuerint explicatae*. Quod enim alias verborum ordinem tenet, non est utique contrarium; neque illud contrarium est, si alias dicit, quod alius praetermittit. Ut enim quisque membratur, et ut cuique cordi erat vel brevius vel prolixius, eandem tamen explicare sententiam, ita eos explicasse manifestum est. » Obiciunt forte, « Evangelisticis per Spiritus Sancti potentiam id debuisse concedi, ut nec in genere verborum nec in ordine nec in numero discrepant, » respondet sanctus doctor, id fieri non debuisse tam ob alias rationes, tum « simul etiam ut, quod ad doctrinam fidem maxime pertinet, intelligeremus non tam verborum quam rerum querendam vel amplectendam esse veritatem, quando

FRANZELIN.

eos qui non eadem locutione utuntur, cum rebus sententiisque non discrepant, in eadem veritate constituisse approbamus." Ita Augustinus l. c.

c) Denique scriptor 2. Mach. quem sub inspiratione Spiritus Sancti scripsisse omnes catholici credimus, stylum et flexum sermonis satis manifesto sibi suaequae eruditio modo ac facultati attribuit. « Ego quoque, ita librum concludit, in his faciam finem sermonis. Et si quidem bene et ut historiae competit, hoc et ipse velim; sin autem minus digne, concedendum est mihi » (grace: sin autem tenuiter et mediocriter, tantum assequipotui εἰ δὲ εὐτέλως καὶ μετριῶς, τούτῳ ἐργάτων ἡ μοί). 2. Mach. XV. 39. Lege de his opusculum citatum cl. Patris Patrizi (de Scripturis divinis §. IV.) (1).

III. Reliqua quae in thesi enuntiavimus, non indigent nisi recapitulatione.

1°. Analysis testimoniorum, quae sive evangelica et apostolica sive ex ss. Patribus in superiori thesi adtulimus, demonstrabit, in illis semper vel supponi vel exprimi

(1) Aliqui ex Scholasticis qui videntur asserere singulorum verborum inspirationem, nonnisi modo loquendi discrepant a sententia, quam nos defendimus. Fatentur enim sufficere, ut scriptor in verbis eligendis per assistantem Spiritum Sancti ab omni errore praeservetur. Ita Suarez de Fide disp. V. sect. 3. n. 4. 5. « Aderto, inquit, dubius modis posse intelligi singula verba Scripturae esse a Spiritu Sancto, per speciale motionem antecedentem vel tantum per assistantem et quasi custodiā. Prior modus erit, quando Spiritus Sanctus vel imprimet conceptum verbi per species infusas saltem per accidens, vel peculiariter movendo et excitando species praexistentes... Non videtur autem necessarium, etiā eruditii quidam recentiores id contendant, ut semper detentur verba hoc peculiariter modo. Quando enim auctor canonicus scribit aliquid, quod secundum se humana est et subiecta sensibus, satis videtur, quod Spiritus illi specialiter assistat, et custodiat ab omni errore et falsitate et ab omnibus verbis, quae non expedient vel decent talem Scripturam, avertenda scilicet speciali providentia omnia obiecta, quae conceptus talium verborum excitat possunt; et in reliquis permittendo, ut scriptor sua memoria et suis speciebus et sua diligentia utatur in scribendo... satis ergo est, ut uno vel altero modo iuxta exigentiam materiae verba sint a Spiritu Sancto. » Hucunque Suarez. Quod inspirationem verborum materialium lega etiam Agobardus Lugdunensem l. contra Frederigum n. 12. 13. in Bibl. Gallandi T. XIII. p. 440.

operationem divinam tam in intellectum quam in voluntatem hominum inspiratorum. Ex una enim parte a) Deus declaratur dixisse Scripturas per prophetas; commendatur Scriptura dicta, scripta, condita, mentibus infusa a Spiritu Sancto, operatione Spiritus, gratia coelesti; sacri scriptores non arte humana opus habuisse, sed tamquam instrumenta operationi Spiritus sese permisso dicuntur; ex parte altera b) ipsi scriptores sacri in Spiritu Sancto, inspiratione Spiritus Sancti, prophetando h.e. acti supernaturali operatione Spiritus (ὑπὸ πνευματικῆς ἀγώνος φροντίδος) sacros textus ut sunt in Scriptura, edidisse atque adeo scripsisse dicuntur; unde fit c) ut ipsi libri et textus, quos Spiritus Sanctus suo charismate inspirans homines, et homines inspirati in virtute Spiritus Sancti scripserunt, sint omnes et singuli Scriptura dicinitus inspirata (πνευματική et verbum Dei. Atqui illa inspiratio activa Spiritus Sancti in homines, ut sint prophetae (sensu biblico latiori) ad scribendum verbum Dei, non potest intelligi nisi ut supernaturalis operatio in mentem ad concipienda sensa Dei et motio in voluntatem ad eadem scribenda; nec status hic inspirationis passivae in homine propheta potest intelligi nisi ut mentis et voluntatis affectio respondens inspirationi activae, tamquam effectus suae causae; nec denique ipsum inspiratum esse Scripturae potest intelligi nisi ut terminus, quem respicit et efficit Spiritus inspirans per hominem in mente et voluntate inspiratum. Porro d) haec analysis operationis duplicitis aliquando diserte ab ipsis Patribus instituitur, ut quando sacri scriptores tum scribenda a Christo capite (illustratione mentis) cognoscisse dicuntur, tum Christus dicitur eis tamquam suis manibus, quod scriberent, (motione voluntatis) imperasse.

2°. Cur inspiratio dicatur *charisma*, satis per se evidens est, cum sit donum spirituale indebitum ac supernaturale. Aequo constat, eam pertinere ad charismata, quae nomine generico sed significazione specifica dicuntur *gratis data*. Revocatur enim ad donum prophetiae generice acceptae (cf. Suarez de Fide disp. VIII. sect. 4. n. 6.), et con-

cessa est non ad personalem sanctificationem accipientis, sed ad sanctificationem ac supernaturalem fructum aliorum et totius Ecclesiae (cf. S. Th. 1. 2. q. 111. a. 1.).

Corollarium 1. Patrum doctrina qua ab inspiratis scriptoribus artem humanam in scribendo excludunt, et eorum aliqui Spiritus Sancti operationem ad omnem apicem Scripturarum pretendi affirmant, tantummodo demonstrat ideas et sententias esse a Deo inspiratas in ordine ad scribendum, hisque exprimendis nulla signa, quibus aliud significaretur quam Deus voluit, sed ubique signa idonea fuisse adhibita sub assistentia Spiritus Sancti; non autem significat, singula vocabula eodem modo ut sensa esse inspirata. Ex parte vero altera scriptorum sacrorum labor et industria ac studium res scribendas investigandi ex documentis et testibus, immo et excusationes de styli ac sermonis tenuitate ostendunt quidem, homines inspiratos non mortua sed viventia et rationalia fuisse instrumenta, qui et ipsi aliquid agerent; non tamen ostendunt, divinam inspirationem eis defuisse. Potest haec res commode illustrari ex modo, quo Deus generatim in ordine gratiae agere solet. Ad praeparandam et conferendam gratiam hominibus potest et solet Deus etiam uti instrumentis externis et sensibilibus (cuiusmodi sunt omnia media sensibilia salutis in Ecclesia, et inter haec ipsa sacramenta). Praeterea per gratiam elevat et viribus supernaturalibus instruit animam ad eos quoque actus virtutum, qui secundum substantiam possunt edi viribus tantum naturalibus; per vires gratiae autem fit, ut actus iam sint supernaturales et alterius plane ordinis, quam si ederentur ab homine suis naturalibus viribus permisso. Sic igitur intelligi potest, quod Deus ad inspirationem idealum et sententiarum, quas Scriptura consignari et ita tamquam verbum suum Ecclesiae proponi voluit, quandoque uteretur etiam instrumentis externis, suppeditando hominibus inspirandis documentis, testes, propriam rerum scribendarum inspectio nem et naturalem cognitionem, quibuscum adiumentis suam internam illustrationem intellectus et motionem voluntatis coniungeret, atque efficeret, ut ea omnia et sola mente

conciperent et complectenterentur voluntate ad scribendum, quae ipse suo consilio comprehendit per Scripturam Ecclesiae communicanda. Hinc nulla adversus inspirationem existit difficultas, quod e. g. scriptor libri 2. Mach. II. 24. 27. ait, se « a Iasoni Cyrenaeo quinque libris comprehensa tentasse uno volumine breviare, » hocque in opere « negotium plenum vigiliarum et sudoris se assumpsisse; » quod pariter s. Lucas I. 2. 3. protestatur, sibi assecuto omnia diligenter, a testibus scilicet rerum gestarum, visum esse haec ex ordine scribere; quod Apostoli et nominatim Ioannes XIX. 36; 1. Io. I. 1. appellant, tamquam ad historicum motivum credibilitatis, ad suam propriam rerum inspectio nem. Haec de ipsis rebus atque sententiis.

Ad vocabula autem et stylum in scribendo quod spectat, cum in his ut plurimum scriptores suo ingenio et eruditioni permissi, per assistantiam Spiritus Sancti tantummodo contra errores ipsi veritati et sinceritati rerum ac sententiarum obfuturos munirentur, poterat scriptor 2. Macch. XV. 39, excusare tenuitatem et medicoritatem, et poterat Paulus 2. Cor. XI. 6. fateri se « imperitum sermone sed non scientia » (ἰδωτης τῷ λογῳ ὀλλ' οὐ τῷ γνωστι.) Hoc eodem sensu s. Thomas declarat, quod dicitur in glossa (ordinaria Walafridi Strabonis) de epistola ad Hebraeos: « non est mirandum (ita Walafridus), quod epistola ad Hebraeos maiore reluet facundia quam aliae; cum *naturale sit unicuique plus in sua quam in aliena lingua valere* » (putavit enim cum aliis, epistolam hanc a Paulo hebraice, ceteras vero graece fuisse scriptas). Unde Angelicus obiicit sibi difficultatem contra supernaturalē donum linguarum Apostolis concessum, eamque ita solvit: « dicendum quod, sicut dicitur 1. Cor. XII. 7, manifestatio Spiritus datur ad utilitatem, et ideo Paulus et alii Apostoli fuerunt instructi divinitus in linguis omnium gentium, quantum requirebatur ad fideli doctrinam; sed quantum ad quaedam quae superadduntur humana arte ad ornatum et elegantiam locutionis, Apostolus instructus erat (scientia acquisita) *in propria lingua, non autem in aliena* » S. Th. 2. 2. q. 176. a 1. ad 1. Sermo est, ut patet, de elocutione et stylo in epistolis inspiratis.

Corollarium 2. Sicut charisma prophetiae generatim spectatum ita etiam charisma inspirationis ad scribendum non complectitur velut elementum essentiale sive ecstasis mentis sive suspensionem libertatis (1). Quamvis enim homines inspirati recipient charisma illustrationis et motionis sine sua libera cooperazione, motio tamen non necessario est huiusmodi, ut voluntatem agat antecedente necessitate; sed satis est, ut eam moveat *infallibiliter* ad obsequendum. Vide Bonfrerii Praeoloquia c. 8. sect. 2. 4. cf. S. Th. 2. 2. q. 173. a. 3. ad 4.

Corollarium 3. Sicut in instinctu propheticō ad loquendū, quem s. Thomas 2. 2. q. 173. a. 4. et ceteri theologi distinguunt a prophetia completa (cf. Aug. Genes. ad litt. I. III. n. 37.), ita etiam in inspiratione ad scribendum non videtur quidem essentiale, ut homo cognoscat se esse a Deo inspiratum; non tamen facile concedendum est, re ipsa aliqui ex sacris scriptoribus suam inspirationem fuisse incomptam. Cf. Io. XI. 49-52. Vide Suarez de Fide disp. V. sect. 3. n. 15; disp. VIII. sect. 4. n. 2. 6; Bonfrerii Praeoloq. c. 8. sect. 6. Per se patet, nostrae fidei de facto inspirationis non minus constare posse per revelationem illius a Christo vel Apostolis promulgatam, etiamsi factum ipsi homini inspirato non fuisset compertum. (2).

(1) « Dicunt aliqui, prophetas extra se raptos prophetare, humana mente a Spiritu obumbrata. Verum id abhorret a professione divinae praesentiae, ut amorem reddit, qui a numine corripitur, et eam plenus esse cooperit divinarum doctrinarum, tunc a propria mente excitat... Quin potius neque Iumen caecitatem parit, sed videndi facultatem a natura insitam elevat; neque Spiritus tenebras inducit animis, sed ad rerum intelligibilium cognitionem mentem excitat a peccati maculis puram » s. Basilus (vel alius) in Is. n. 5. T. I. p. 381.

(2) Homini inspirato non solum certitudine humana sed certitudine supernaturali constare debet de sua inspiratione, si ipsem a Deo destinatur ad suum librum tamquam inspiratum proponendum, vel ad veritates sibi inspiratas tamquam revelationem divinam promulgandas. Sed haec ipsis hominis inspirati destinatio ac missio sane non pertinet ad essentiam inspirationis. Imo etiamsi e. g. de inspiratione librorum dero canonorum V. T. nec scriptoribus nec ulli hominum ante Christum et Apostolos certo constitisset, inde omnino nihil sequeretur difficultatis contra eorum verissimam inspirationem nobis a Christo vel a Spiritu

Corollarium 4. Licet praeter Scripturas alia extant documenta ecclesiastica, quae et verbum Dei continent et edita sunt sub assistentia Spiritus Sancti errorem infallibiliter praecaventis, non tamen ideo praeter Scripturas alia sunt monumenta inspirata.

Corollarium 5. Cum propositio verbi *per libros* a Deo facta saltem secundum ordinariam librorum destinationem non videatur posse concepi per modum revelationis privatae, sed ex sece publica sit et directa ad populum Dei, vel certe hunc scopum habeant omnes libri, qui possint computari ad *sacram Scripturam* secundum propriam huius nominis significationem (vide th. I.); constat charisma extraordinarium inspirationis ad scribendos libros *sacrae Scripturae* cum ipsa consummatione revelationis catholicae desiisse. Vide Tract. de Traditione th. XXII. Licet vero etiam in praesenti economia consummatae revelationis catholicae non absolute repugnet inspiratio ad scriptiorum aliquam privatam, huiusmodi tamen scriptio, si exstaret, ad *Scripturam Ecclesiae consignatam et ab Ecclesia fidelibus proponendam nullatenus pertineret; sed de illa eodem modo sentiendum esset, ut de revelationibus privatis generatim diximus in Corollario ad citatam th. XXII.*

Sancto per Apostolos revelatam. Quod *prophetia* proprio ac pleno sensu non est aut dicitur, ubi deest homini inspirato conscientia supernaturalis charismatis, non probat, neque *inspirationem* ad scribendum sine hac conscientia posse consistere; quamvis inde possit inferri, non esse admittendam talem hominis inspirati ignorantem, nisi aliunde satis probetur. Huiusmodi autem probatio ignorati charismatis revera non suppetit in illo ex scriptoribus librorum sacrorum, quos habemus in canone. Confer cl. Denzinger de Cognit. Relig. T. II. l. II. n. 126.

THESIS IV.

*Confutatur notio inspirationis
quae sit per meram assistentiam divinam, et quae
dicitur inspiratio subsequens.*

« Falsum est, quod Iohannes Iahn aliquę docerunt, sufficere ad rationem libri inspirati, et re ipsa inspirationem s. Scripturae in eō tantum esse positam, quod Deus sua assistentia averterit periculum errandi et homines reddiderit infallibilis in scribendo; idque falsum est, sive veritates ita scriptae iam prius revelatae foisse dicantur sive revelatae non fuerint. Minorī adhuc iure aliqui divinum testimoniū de plena veracitate libri, humana solum opere scripti, appellariāt inspirationem subsequentem, et libros aliquos s. Scripturae præser-tim in narrationib⁹ rerum gestarum quae scriptoribus humanit⁹ erant compartae, hoc modo subsequenter tantum inspiratos censeret, hand nefas esse putaverunt. »

I. Priorem inspirationis notionem inter duas quas con-futamus, absolute et nullo inter libros Scripturae sive pro-pheticos sive historicos facto discrimine statuit Iohannes Iahn. Ita enim ille definit. « *Divinam assistentiam ad praecac-tendos errores appellamus suggestionem seu inspirationem,* quae appellatio usū loquendi consecrata est, quamvis non valde apta sit; exprimit enim aliquid *positivum*, cum tamen notio ei subiecta sit *negativa*. In hoc ipsis quippe haec divina praemunitio ab erroribus differt a revelatione, quod scrip-tori nullas novas cognitiones suppeditat, eum nihil docet; sed tantummodo impedit immixtionem errorum in iis, quae iam novit; revelat autem doctrinas, cognitiones et intel-ligentiam divinorum consiliorum subministrat. Haec defini-tio inspirationis et distinctio a revelatione diligenter ani-madvertenda est; frequenter enim una cum altera permis-cetur, ex qua confusione magnae deinde oriuntur difficultates. » Haec ille in *Introductione ad divinos libros V. T. ed. 2^a.* T. I. §. 19.

Bonfrerius obiter legenti eiusdem videri posset senten-tiae; revera tamen eius opinio multum ab illa Iahni dif-ferit, licet etiam in Bonfreriana explicatione nequeat censi-ri genuina et integra notio inspirationis expressa esse, nec ea

praesertim post definitionem Vaticanam amplius possit sus-tineri. Distinguit Bonfrerius modum triplicem, quō se ha-beat Spiritus Sanctus erga sacros scriptores, *antecedenter, concomitanter et consequenter*. De inspiratione sic dicta conse-quente agemus postea; interim *antecedentem* appellat Bonfrerius, « cum Spiritus Sanctus inspirat, revelat, demon-strat, quae dicenda scribendave sunt, ita ut de suo marteve proprio nihil addat scriptor; sed ea dumtaxat scribat, quae a Spiritu Sancto inspirata revelataque sunt. » Hunc modum refert ad eas partes librorum, ubi res inspiratae sunt ex sese supra vim intelligentiae humanae, nec homini natura-liter vel cognitae vel cognoscibiles. *Concomitanter* existi-mat se habuisse Spiritum Sanctum cum ss. scriptoribus in li-bris historicis, qua parte narrantur res gestae aliunde scrip-toribus compertae: « ita (inquit) Evangelia, ita Acta Apo-stolorum, ita Machabaeorum libri, ita ceteri libri historici a prophetis alliue conscripti. » Videri autem posset hic secundus modus *concomitanus* Bonfrerii prorsus idem esse ac inspiratio illa a Iahno asserta, non tamen est. Ita lo-quitur: « concomitanter sese habet Spiritus Sanctus, cum non ad modum dictantis et inspirantis (intellige: suppedi-tantis res incompartas) se habet sed ad eum modum, quo qui alterum scribentem oculo dirigeret, ne in re quapiam erraret. Hoc enim modo potest Spiritus Sanctus scriptorem hagiographum dirigere, ut in nullo eum errare fallive per-mittat; cum enim praesciat, quid ille scripturus sit, ita ei adstat, ut sicubi videret eum erraturum, inspiratione sua (suggestione rei incompartae) illi esset adfuturus. » Porro in hominibus sub hac concomitantib⁹ Spiritus Sancti actione scri-bentibus « est determinatio quaedam ab extrinseco, ut diversa vel contraria iis quae scribunt, scribere non possint, cum scribentes Spiritus Sanctus non patiatur errare, semper ad-stet scribentibus *paratus in actu primo illis, quae scri-benda sunt, inspirare*, sicubi sibi relicti essent aberraturi; ab intrinseco tamen liberi sunt, cum re ipsa illos Spiritus Sanctus non determinet, nec quidquam antecedenter in illis operetur, nisi *sicubi operatio divina illis est necessaria*. Praelog. c. 8. sect. 1-4. Vide etiam Richardi Simon Hist.

crit. N. T. P. I. c. 23. 24; Calmet dissert. de Inspirat. art. 2.
(ad 2. Pet. I. 21.).

Discrimen itaque huius sententiae ab altera Iahnni potissimum duplex est, quod a) Bonfrerius solam assistentiam ad praeavendos errores non extendit ad omnes libros et textus Scripturæ; quod b) cum assistentia ubique in omnibus libris et locis coniunctam admittit inspirationem positivam *in actu primo*, quæ quoties est necessarium, transeat *in actu secundum*, atque scriptori res ipsas et sententias scribendas suggerat; ex quibus tribus notionibus, assistentia ad cavendos errores, *parata in actu primo* suggestione scribendorum, *suggestione scribendorum in actu secundo* ubi necessitas postulet, consistit et absolvitur notio integra illius modi *concomitantis*; non ergo haec, ut apud Iahnium, est notio solum *negativa* (I). Quae quamvis ita sint, existimamus tamen hanc etiam Bonfrerii sententiam et explicacionem inspirationis *concomitantis* sine dubio falsam esse. Quamvis enim inspiratio proprie dicta *in actu primo* ubique scriptori parata esse dicatur, re tamen vera in sacris libris multa exstant scripta, quæ in actu secundo proprie inspirata non essent, sed solum humanis viribus licet sub assistentia Dei infallibili conscripta. Unde ex parte convenit cum Iahnni sententia, atque adeo simul cum ea confutabitur. Sententia autem Iahnni confutatur iis omnino omnibus argumentis, quibus II. et III. thesim probavimus.

1º. Ipsem Iahn fatur, nomine *inspirationis* significari actum positivum; unde hoc nomen ait minus esse idoneum ad exprimendam notiōnēm *negativā* a se statutam. Atqui nōmen est biblicum adhibitum ab Apostolis; eius notio *positiva* manifesto deducitur ex doctrina Christi, prophetarum et Apostolorum, ut ea exhibetur tam in Scripturis veteris

(1) Si quis legat Du Pinii dissertationem præliminarem in Scripturas T. I. l. I. e. 2. §. 7. et citata ibi verba aliqua detruncata Cornelii a Lapide in commentario in 2. Tim. III. 16, existimare posset, Cornelium in libris Scripturæ historicis et moralibus assistentiam Spiritus Sancti ad scriptiōnēm infallibilem admissē, non autem inspirationē sensu proprio, quo eam tenendam esse dicimus. At Cornelii doctrina de inspiratione eo ipso in loco est omnino sincera, dummodo contextus integer legatur.

Testamenti quam in scriptis evangelicis et apostolicis; est declarata in universali praedicatione ecclesiastica; expressa in symbolis et in Conciliorum definitionibus (th. II. III). Ergo ex ipsa doctrina revelata quam in superioribus demonstravimus, Scripturæ sunt inspiratae sensu proprio et *positivo*, non autem *impropria* et *negativa* solum significatione.

2º. Ex demonstratis inspiratio talis est actio Dei in homines, et libri Scripturæ ita sunt opus hominum inspiratorum, ut Deus credi debeat *librorum auctor*. Atqui si divina assistentia solum impedivit errores, ceterum vero homines proprio marte libros scripserunt, Deus non est *auctor librorum*.

3º. Si ea esset notio inspirationis et si Scripturæ eo sensu sensu essent inspiratae, oecumenica Concilia et summus Pontifex possent scribere libros vel certe documenta definitionum per inspirationem, et charisma inspirationis proinde esset ordinarium. Re etiam vera alia praeter Scripturas existentia documenta inspirata. Atqui haec omnia oppido falsa sunt.

Per se patet, hanc inspirationis notionem manere falsam, sive agatur de locis Scripturæ continentibus doctrinam extra actum inspirationis iam revelatam scriptoribus ipsis vel aliis, sive sermo sit de libris et locis, quorum doctrina et sententiae aliunde revelatae non erant. Si enim doctrina revelata litteris consignetur ab homine marte proprio et Dei assistentiā solum præcavente errorem; non propterea Deus erit *auctor libri*, licet infallibiliter continentis doctrinam revelatam, ut patet in canonibus et definitionibus Conciliorum, in quibus infallibiliter continetur doctrina revelata, non tamen Deus est *auctor scripti ipsius* eo sensu proprio, quo Deus credendus est *auctor Scripturæ inspiratae* (th. II. III.).

4º. Conceptu illo Iahnni de inspiratione supposito multa in Scripturis continerentur explicite, quæ tamen non essent verbum Dei, nec a Deo explicitè revelata. Si enim s. Lucas exempli gratia (quod idem valet de aliis narrationibus historicis et doctrinis moralibus Bibliorum) in Actis res

gestas Pauli et aliorum narravit tantummodo, quatenus eas novit scientia humana acquisita, et Deus solum impedivit errorem; illa facta in se ipsis non sunt a Deo manifestata sed ab homine tantum, licet ex divina assistentia infallibiliter certum sit, facta accidisse ita, ut ab homine narrantur. Quia igitur haec assistentia supponitur revelata, poterit in revelatione divinae assistentiae censeri implicite revelata *veritas* factorum quae narrantur; non tamen facta erunt revelata explicite et in se ipsis. Qui ergo ea facta negaret, peccaret contra fidem, quia negaret verbum Dei revelantis assistentiam et in assistentia infallibilem veritatem narrationis, non autem negaret verbum Dei explicite revelantis ipsa facta in se ipsis, quia huiusmodi verbum nullum existeret. Unde divina revelatio ad huiusmodi facta et doctrinas morales sacrae Scripturae eo fere modo se habet, quo e. g. se habet revelatio ad facta dogmatica, quae ab Ecclesia infallibili veritate definitur. Atqui haec omnia sunt prorsus falsa et absurdula. Ergo falsus est ille conceptus inspirationis, ex quo haec consequuntur.

II. In altera parte theseos agimus de opinione aliqua singulari, quae olim a paucissimis quibusdam theologis in Belgio proposita tamquam hypothesis possibilis, nostra aetate in lucem revocari coepit velut thesis de notione inspirationis reipsa obtinentis in quibusdam Scripturae libris Bonfrerius l. c. sect. 7. describit tertium modum, quo Spiritus Sanctus se habere posset in librorum scriptione. *a Consequenter se habere posset* Spiritus Sanctus, inquit, si quid humano spiritu absque Spiritu Sancti ope, directione, assistentia a quopiam scriptore esset conscriptum, postea tamen Spiritus Sanctus testaretur, omnia quae in eo scripta essent, vera esse; certum enim est, tunc totum hoc scriptum fore Dei verbum, et eandem, infallibilem veritatem habitum, quam habent cetera, quae inspiratione vel directione eiusdem Spiritus Sancti conscripta essent. *

Librum ita a Spiritu Sancto probatum fore *Scripturam sacram*, persuadere instituit duplice argumento. Nam a) decretum quod ab alio proprio marte scriptum rex approbat, fit verbum regis. b) Sententiam aliquam ab homine prola-

tam Spiritus Sanctus a potest reddere Scripturam sacram et verbum Dei eam probando et veram esse asserendo; et ita de facto fecit, approbando sententiam aliquam poetarum profanorum Arati Act. XVII. 28. et Epimenidis Tit. I. 12. et Menandri 1. Cor. XV. 33. (vide s. Hieronymum ep. 70. n. 2. ad Magnum). Ergo a pari modo integrum historiam vel librum aliquum quamquam initio profano spiritu scriptum posset Spiritus Sanctus Scripturam sacram reddere asserendo, vera esse omnia quae in eo libro haberentur. Declarat vero Bonfrerius diserte, hanc suam hypothesis se nolle applicatam libro cuiuscumque Scripturae sacrae, quam nunc habemus. *a Hoc tertio modo*, inquit, etsi non existimat Spiritum Sanctum aliquando usum in iis quos habemus sacrae Scripturae libris, absolute tamen nihil vetat uti, vel etiam aliquando usum forte in iis libris nonnullis, quos diximus fuisse Scripturam sacram et postea tamen intercidisse, quia scilicet in Scriptura quam habemus, ipsa citatione et appellatione ad eos videntur approbati esse ut veraces. Ita etiam ut doctrina *hypothetica et possibilitatis* ante Bonfrerium a Lessio et Hamelio thesis proposita est (1): *a si aliquod opus pium et salutare humana industria ex divino instinctu compositum* (2) publico testimonio Spiritus Sancti approbaretur tamquam in omnibus suis partibus verissimum, tale opus habiturum auctoritatem aequa infallibilem, atque (habet) Scriptura sacra, et recte Scripturam sacram et verbum Dei appellatum iri. Nam eiusdem est auctoritatis epistola a rege dictata, et (alia) ab eo subscripta; qui modus, etsi de facto putem eum non inveniri in aliquo Scripturae canonicae libro, non tamen est impossibilis (Hist. Congreg. de Auxil. Livini de Meyer l. I. c. 9. ed. Venet. 1742. p. 24.).

(1) In thesibus ab adversariis obiectis, quas Lessius et Hamelius non agnoverunt ut suas, haec ita erat concepta: *a liber aliquis, qualis forte est secundus Machabaeorum, humana industria sine assistentia Spiritus Sancti scriptus, si Spiritus Sanctus postea testetur nihil ibi esse falsum, efficietur Scriptura sacra* (Hist. de Auxil. l. I. c. 7. p. 17.).

(2) Si hic instinctus esset ea inspiratio, quam superioribus thesibus descriptissimus, theoria haec nihil haberet commune cum altera Bonfrerii; sed revera in contextu non videtur significari illa proprie dicta inspiratio.

At nostris hisce temporibus opinio de approbatione subsequente, qua liber aliquis fiat Scriptura sacra, proposita est formâ longe deteriori a nonnullis eruditis, qui censuerunt re ipsa plures seu libros seu librorum textus extare in nostro canone Scripturarum, qui humana tantum ope scripti postmodum fuerint nihilominus auctoritate et approbatione Ecclesiae accensiti sacris Scripturis. Imo appellando ad Bonfrerium hanc approbationem dicunt *inspirationem subsequentem*, et librum ita approbatum fieri aiunt *inspiratum*, quem quidem modum loquendi valde incommodum et vero ineptum, nec Bonfrerius nec ullus alius ante haec tempora adhibuit. Proponunt itaque et suam faciunt in primis distinctionem inspirationis *antecedentis* et *concomitantis*; tum ita prosequeuntur. « Fieri etiam potest, ut scriptum aliquod primitus solis ordinarii humanis viribus confectum, eo demum ad dignitatem verbi Dei elevatum esset atque hoc ipso *inspiratum* evasisset, quod canoni *insertum est* (1). In hac hypothesi scriptum aliquod factum

(1) *Insertio in canonem non est nisi testificatio et declaratio librum esse inspiratum, ac proinde inspiratio non efficitur per insertiōnem in canonem; sed ei praesupponitur ut obiectum Iosephi. Est haec doctrina de modo, quo liber inspiratus fieri queat, eo magis mira, quod insertio in canonem seu in elenchum librorum, qui certo et indubitate ab omnibus credendi sunt inspirati, fieri potuit et quoad aliquos libros re ipsa facta est ab Ecclesia post tempora Apostolorum ex Traditione quidem apostolica. Quam insertionem posteriorem auctor non solum non negat, sed videtur non abhorrire a sententia, libros ab Apostolis nondum habitos tamquam inspiratos posse deinceps ab Ecclesia declarari canonicos atque ita reddi inspiratos. Existimat enim libros Paralipomenon, Esdrae, Nehemiae, Esther post aetatem demum Iosephi Flavii et usq; magis magisque consecratos fuisse, « hisque » ab Ecclesia circa idem tempus additos fuisse libros deutero canonicos (Histor. relat. p. 697, 699.). Ex hac opinione consequeretur, Ecclesiam posse efficiere, ut liber antea non inspiratus, incipiat esse inspiratus, quod sancidi non potest. Aliquid huiusmodi indicavit Sextus Senensis Bibl. sacrae l. VIII. haeres. 12. ad obiect. 7. ed. 1742. T. II. p. 1098. « Nec quidquam, inquit, illorum (librorum Mach.) fidei derogatur, etiam si ab auctore profano scripti sint, cum libri fides non ab auctore sed ab Ecclesia catholicae auctoritate pendeat, et quod illa accepte, verum et indubitatum esse oportet, a quo cum dictum sit auctore, quem (auctorem Mach.) ego neque sacrum neque profanum ausim affirmare. » De-*

esset verbum Dei eo modo, quo locus aliquis a Cicerone scriptus fit verbum meum, quando illum in aliqua oratione vel epistola usurpo ad *meum* conceptum exprimendum: haec est *inspiratio subsequens*. Quaenam ex hisce tribus speciebus inspirationis ad hunc vel illum librum, ad hunc vel illum versum referenda sit, vix potest singillatim definiri; dicere tantum possumus, ea loca, in quibus expressum est: haec dicit Dominus vel aliquid simile, probabilius ad primam (antecedentem), *narrationes cetero historicas rerum quae subsunt experientiae, ad posteriorem (subsequentem) pertinere posse*. Libri poetici videntur potissimum ad secundam (concomitantem) censendi » (Historia revelationis biblicae auctore D. Daniele Haneberg. 1830. p. 774).

Haec omnia praesertim post definitionem editam in oecumenico Concilio Vaticano, sustineri nullo modo possunt. Definitio ita habet. « Eos vero (libros integros cum omnibus suis partibus, prout in Trid. Concilii decreto recententur et in veteri vulgata latina editione habentur) Ecclesia pro sacris et canonicis habet, non ideo quod sola humana industria concinnati, sua deinde auctoritate sint approbati; nec ideo dumtaxat, quod revelationem sine errore contineant; sed propterea, quod Spiritu Sancto inspirante conscripti Deum habent auctorem, atque ut tales ipsi Ecclesiae traditi sunt » (Constitut. *Dei Filius* cap. 2.). Ut patet, a) duplex error haec Concilii declaratione *directe excluditur*, quod libri aliqui Scripturae sint scripti sola humana industria, qui tamen ab Ecclesia deinde approbati et inserti in canone Scripturarum, haec ratione habeantur sacri et canonicci; vel quod aliqui libri Scripturae solum ratione materiae non autem ratione ipsius scriptiorum sint libri divini. b) Positive docetur, libros Scripturae esse sacros ratione ipsius scribuisset adverte Sixtus, Ecclesiam infallibilem tradere hos libros ut auctorum inspiratorum, et ideo quia oportet indubitatum esse, quod illa ex Traditione apostolica accepit, repugnare auctores fuisse profanos; et repugnare, ab Ecclesia infallibili tradi tamquam Scripturam sacram librum scriptum ab auctore profano. Ab Ecclesiae itaque auctoritate pendet nostra cognitio, librum esse inspiratum; non autem ab ea pendet, sed tamquam obiectum Traditionis et definitionis praecedit et praesupponitur ipsum factum inspirationis.

ptionis sub inspiratione Spiritus Sancti ita, ut Deum habent auctorem. Neque tamen singulæ notæ, quibus constet inspiratio divina, et quæ requirantur, ut Deus sit auctor librorum, a Concilio ipso explicantur. Hinc c) theologice demonstrando notionem inspirationis eiusque discriben ab assistentia divina, atque declarando, quid requiratur vel saltem quid non sufficiat ad illud, ut Deus sit auctor librorum, ex hac definitione Concilii per conclusionem theologicam infertur falsitas illius etiam sententiae, quae solam assistentiam divinam qua Deus scribentibus adfuerit eos praemuniens ab omni errore, sufficere asserit ad rationem Scripturae sacrae, qualen Ecclesia nunc habet, reque ipsa in aliquibus libris sacris aut librorum partibus non aliam inspirationem ab hac assistentia distinctam locum habuisse.

d) De sententia vero mere hypothetica, ut eam Bonfrerius explicuit, Concilium non loquitur. Revera si tantummodo dicitur, librum humanitus scriptum, cuius in omnibus et singulis veracitatem Deus postmodum revelatione publica revelasset, posse dici sacram Scripturam et habiturum auctoritatem divinam, lis potest esse de verbis, dummodo agnoscatur diversitas huiusmodi libri a Scriptura divinitus inspirata, quam accepit et habet Ecclesia.

Quod spectat ad intestinam fallaciam illius perperam appellatae *inspirationis subsequentis*, ut rerum confusionem extricemus, distinguimus tria haec: liber est inspiratus, liber est Scriptura sacra, liber continet verbum Dei; postremo vero quaeremus, quomodo non absolute repugnet, aliquem librum humanitus scriptum fieri scriptum divinitus seu inspiratum.

1^o. *Inspiratio* est divina supernaturalis actio in hominem scribentem, ex qua liber ab homine inspirato scriptus, est et appellatur *terminative* inspiratus. Atqui divina approbatio et declaratio, in libro aliquo humana solum ope scripto nihil esse non verum, non est actio Dei in scriptorem; nec per hanc declarationem fit, ut actus præteritus scribendi desinat esse mere humanus, et liber iam pridem conscriptus ope mere humana incipiat esse scriptus divinitus. Ergo talis approbatio non est necesse potest inspiratio, nec talis liber potest esse inspiratus.

2^o. Nomen *Scripturae* et *Scripturae sacrae* est ex usu biblico et christiano nomen proprium designans non aliud quocumque sacrum monumentum nisi libros et partes librorum, qui sub divina inspiratione scripti sunt. Ergo cum subsequens divina approbatio et declaratio veracitatis non possit efficere librum inspiratum et origine homogeneum libris Scripturæ; neque potest efficere, ut pertineat ad s. Scripturam proprio nomine dictam. Si scriptura sacra accipiat significatione communiori et generica, efficiet utique divina revelatio veracitatis et sanctitatis doctrinæ, ut talis scripture iam sit sacra, sicut definitiones Conciliorum vel Romanorum Pontificum propter infallibilem veracitatem, de qua ex revelatione divina constat, dici possunt scripta sacra.

3^o. Ex huiusmodi attestatione veracitatis libri a Deo ipso per revelationem catholicam facta consequeretur sane, ut quæ in libro humanae originis continentur, essent veritates divinitus revelatae et proinde verbum Dei credendum. Sicut enim generati veritates ab hominibus naturaliter cognitas, ita etiam veritates naturaliter ab aliquo homine cognitas et scriptas posset Deus revelatione supernaturali proponere credendas, idque efficeret hoc ipso, quod per publicam revelationem attestaretur veracitatem libri. At non ideo liber ille humanitus scriptus esset liber inspiratus aut Scriptura sacra proprii nominis, quamvis dici posset liber divinus ratione materiae et veritatum, quas continet (cf. th. II.). De huiusmodi catholicæ revelatione Dei subsequentे locuti sunt illi nonnulli theologi Belgæ, de quibus diximus. Quia vero viderunt, libros quo habemus in canone, simpliciter et omnes una ratione esse traditos ut *libros Dei auctoris*, de ista vero alia diversa revelatione subsequente quad aliquem eorum nullum esse vestigium; ideo sapienter protestati sunt, se illam suam theoriam hypotheticam nulli prorsus libro canonico applicatam velle. At quod Sixtus Senensis et quidam recentiores dixerunt de susceptione in canone per auctoritatem Ecclesiae, qua liber humana solum industria scriptus fieri possit Scriptura sacra, imo re ipsa aliquos libros vel librorum partes hac insertione in cano-

nem evasisse *Scripturam inspiratam inspiratione subsequente*, longe diversum est. Talis enim libri humani suscepito in canone a) ab infallibili Ecclesia fieri nequit, quia esset fallax testimonium de libri inspiratione, qui inspiratus non est. b) Infallibilis definitio Ecclesiae de veritate omnium quae in libro aliquo humano continentur, non repugnat quidem; at per eam non solum liber non fieret *Scriptura inspirata*, sed neque efficeretur, ut veritatis in eo libro contentae essent veritates divinitus revelatae. Talis enim definitio eodem modo se habert ut definitio in factis dogmaticis; constaret scilicet de veritate omnium quae scripta essent in libro, non per immediatam revelationem Dei sed per revelationem infallibilitatem testantis Ecclesiae vel Pontificis; credenda ergo essent fide non immediate sed mediante divina (cf. supra p. 124.).

Ceterum illi theologi nonnulli qui locuti sunt de subsequente revelatione Dei, per quam liber humanus fieri posset *Scriptura sacra*, videntur decepti esse confusione divinitatis libri ratione *materiae* quam continet, et ratione *scriptionis*. Confundunt scilicet comprehensionem verbi Dei et divinam originem seu inspirationem ipsius *scriptionis*. Quia vident divina revelatione subsequente effici posse, ut quod continetur in libro veraci humanitus scripto, iam sit verbum Dei, concludunt, librum ipsum esse inspiratum et esse *Scripturam sacram*, quod tamen nullo modo sequitur.

Hinc etiam respondebis ad probationem, quam adferunt ex similitudine diplomatis regii. Si minister regius documentum suo marte scripsit rege nec sensu suppeditanus nec movente voluntatem ministri, nulla approbatione rex fieret auctor *scripti operis*. Approbatione tamen regis leges, quae in eo documento scriptae essent, fierent leges regiae, quia lex suam formalem rationem et robur legis obtinet non a iureconsultis qui illam mente conceperunt, et scripserunt, sed ex manifestatione voluntatis regiae et ex approbatione a rege facta. Hoc etiam sensu codices legum tribuuntur principibus e. g. Iustiniano, Theodosio etc. non quod ipsi dicantur *auctores librorum*, sed quod contenta in codicibus ab auctoritate et voluntate principum vim legis habent.

Neque enim eadem est significatio, quando dicitur *auctor libri*, et quando nominatur *codex Theodosianus vel diploma regis vel testamentum testatoris*; prior illa locutione significatur, ex cuius mente ipse sententiarum complexus emanaverit et conscriptus fuerit; appellationibus posterioribus per se tantummodo dicitur, a quo *codex*, *diploma*, *testamentum* habeat auctoritatem et vim obligandi.

4^a. Quia adversarii provocant ad sententias alias gentilium, quas dicunt factas esse *Scripturam sacram* subsequente approbatione veracitatis, et ad similitudinem, quod unus alterius e. g. Ciceronis sententias potest reddere suas; ad huius rei declarationem inquirendum est, quomodo documentum pridem humanitus exaratum possit fieri inspiratum. Ex dictis iam constat, librum inspiratum et proprio nomine *Scripturam sacram* non posse esse nisi ex actione supernaturali Dei in hominem ad scribendum, ex qua liber existit *origine inspiratus*. Ergo a) nulla subsequens approbatio potest librum reddere inspiratum. b) Nec assumptio sententias profanae facta ab auctore inspirato eam efficit in se inspiratam, quamvis relatio et applicatio vel narratio illius sententiae ab homine profano dictae sit inspirata. Sic e. g. relatio sermonum amicorum Iob, immo etiam sententiarum hominum impiorum, « qui dixerunt cogitantes apud se non recte... coronemus nos rosis » etc. Sap. II, narratio dicti a caeco sanato: « Deus peccatores non audit » Io. IX. 31, applicatio versuum Arati et Epimenidis Act. XVII. 28; Tit. I. 12, sine dubio inspirata est; at non ideo illae sententiae in se, vel ut extant in libris poetarum, evaserunt veritas inspirata. Nihilominus c) non repugnat, aliquam sententiam veram sed humanitus scriptam fieri inspiratam. Sicut enim praecedens naturalis cognitio veritatis non est ratio, cur Deus eam non possit inspirare ad scribendum, ita etiam praecedens naturalis scriptio non est ratio, quae ex se impedit inspirationem eiusdem veritatis ad eam scribendam divinitus; tum vero neque repugnaret, ut ad sententiam eandem inspiratam exprimendam adhiberentur eadem verba, quibus usus est auctor profanus. Sic non repugnat, ut auctor inspiratus 2. Mach. compendium

historiae Iasonis Cyrenaei sibi inspiratum ad scribendum, concepisset verbis ipsius Iasonis, quem supponimus auctorem non inspiratum. Hinc etiam concedimus non absolute repugnare, ut inspirarentur res et sententiae omnes, quae iam extarent scriptae humanitus in aliquo libre undequaque veraci. Si deinde res illae omnes et sententiae inspiratae ad scribendum exprimerentur iisdem verbis, quibus usus erat auctor non inspiratus; in hac hypothesi idem conceptus vel idem liber integer scriptus esset his modo valde diverso, semel humanitus et iterum divinitus. Hoc vero licet ex ipsis notione inspirationis per se non repugnans, attamen si de libro integro agatur, fere ludicrum videtur, nec satis conciliandum cum divina maiestate et sapientia.

CAPUT II.

DE MODO QO LIBRI INSPIRATI NOBIS INNOTESCUNT.

THEISIS V.

De ineffacia argumentorum internorum ad demonstrandam inspirationem librorum.

* Nullo iure quidam Protestantes quoad libros novi Testamenti criterium tum positivum tum exclusivum ad dignoscendas Scripturas inspiratas collocauerunt in munere apostolatus, quo scriptores fuerint insignes. Fallax pariter est argumentum, quo Protestantes alii eos liberos omnes et solos, quos in sua ab Ecclesia defectione eum unicam fidei regulam conservarunt, tamquam divinitus inspiratos innotescere affirmant ex characteribus internis librorum, tum ex eorum doctrina scilicet et forma tum ex salutari in legionum animos efficacia. *

I. Ioannes David Michaelis (Introduct. in N. Testam. T. I. cap. 3.) hanc statuit doctrinam. a) Nemini Protestantium ex principiis suae Confessionis fas est appellare ad testimonium Ecclesiae sive praesentis sive antecedentis aut etiam apostolicae aetatis ad probandam inspirationem librorum sacrorum, quos suscipiunt velut unicam regulam fidei. Argumentum vero Protestantium ductum ex « sapore » et ex utilitate horum librorum inane est et inefficax ad

probandam inspirationem (1). b) De inspiratione librorum V. T. possumus certi esse ex testimonio Christi et Apostolorum; huiusmodi vero testimonium disertum nullum exstat pro inspiratione librorum N. T. c) Criterium validum pro inspiratione horum librorum unicum est, si sint scripti ab Apostolis. Unde inspiratio librorum N. T., qui ab aliis scripti sunt quam ab Apostolis, ut Evangelii Marci et Lucae, non potest demonstrari. d) Apostolos inspiratos fuisse vi muneric apostolici, a Michaelis probatur argumentis, quae revocantur ad tria. z) Apostolorum munus et charisma est excellenter quam prophetarum; atque prophetae erant inspirati; ergo inspirati erant etiam Apostoli. β) Christus promisit et misit Apostolis Spiritum Sanctum, ut doceret eos omnem veritatem. γ) Fides nostra innititur doctrinae Apostolorum; ergo eorum scripta in quibus doctrina fidei ad nos pervenit, debent esse inspirata. Habant a Christo potestatem legiferam; ergo eorum scripta quae continent doctrinam moralem, sunt inspirata (2). Tandem appendicis

(1) De his argumentis Protestantium ex interna librorum inde ductis paulo post agemus. Interim confessio Michaelis non caret suo valore et acumen. In versione gallica ita est. « Une sensation intérieure des effets du St. Esprit et la conviction de l'utilité de ces écrits pour améliorer le cœur et nous purifier, sont des critères aussi incertains que le précédent. Quant à cette sensation intérieure, je dois avouer que je ne l'ai jamais éprouvée, et ceux qui la ressentent, ne sont ni dignes d'envie ni plus près de la vérité, puisque les Mahométans l'éprouvent aussi bien que les Chrétiens (hac valent de sensu fanatico pietistarum et aliorum enthusiastarum); et comme cette sensation intérieure est la seule preuve sur laquelle Mahomet ait fondé sa religion, nous devons conclure, qu'elle est trompeuse. L'autre caractère est également insuffisant, puisque de pieux sentiments peuvent être excités par des ouvrages purement humains, par les écrits des philosophes ou même par des doctrines fondées sur l'erreur; et s'il était possible de tirer une conclusion de ces prémisses, les prémisses elles-mêmes sont incertaines, puisqu'en a l'exemple d'hommes souverainement méprisables, qui ont cru avoir atteint le plus haut degré de sainteté » (hac omnia vera sunt, si sistitur in mero sensibili affectu, et vera fides tamquam norma dirigens non praesupponitur).

(2) In verbis Christi Matth. XVI. 18. 19: « tu es Petrus et super hanc petram aedificabo Ecclesiam meam... Quodcumque ligaveris super terram, erit ligatum et in celis, et quodcumque solveris super terram,